

900 cara con loro vuodi, ozi si ha ditti cari sono cergi di cosse di campo; sichè è questi varii avisi. *Unum est*, vieneno avanti.

187 *Di dito capitano zeneral, di Vicenza, gionse, al tardi, letere di hore 7 di note.* Come Troylo Pignatello, è fuora con li cavali lizieri, li dà aviso i nimici esser alozati a Sozan, et quanti villani trovano li amazano per la crudeltà feno a li fanti spagnoli presi per li nostri, *adeo* da Lonigo fino a Vizenza non si trova per le ville, ch'è mia . . . , alcun vilan, et sono fuziti. *Item*, avisa che alcuni villani li ha ditto esser partiti una bona summa di cavali dil campo con fanti in gropa et vanno a la via dil Beton; tien esso capitano vadino a dar il guasto in qualche locho, per il che ha mandato Mercurio Bua con 400 cavali lizieri a questa volta di padoana, et scritto Renzo capitano di le fantarie penzi fuora di Padoa *etiam* li soi 150 cavali lizieri l'ha. *Item*, à mandato una altra cavalchata di cavali lizieri a scorer fino su le porte di Verona facendo li danni poleno, et questi sono altri 400 cavali. Lui capitano non resta far ogni provision etc.

Et zonto le dite letere, *iterum* fo mandato per alcuni vicentini, è in questa terra, per saper le strade, et veneno domino Anzolo di Chaldonio dotor, domino Zentil Brazoduro dotor et Zuan Batista da Porto, li qual concluseno in ogni tempo i nimici veniseno tra Padoa e Vicenza, il nostro campo, ch'è in Vicenza, pol venir seguro per la via di Citadela a Padoa over andar a Treviso; tutavia pasando la Brenta. *Item*, che, pagando, harano nostri in Vizenza vituarie assa'; et cussi si stete in Colegio su questi rasonari. Domino Lunardo da Porto dotor è zà ito a Vizenza etc. Il capitano zeneral *iterum* replica non si dubiti; è segurissimo in Vicenza, nè li par da moversi per alcun modo, et promete mantener l'exercito e non perder pur uno cavalo.

In questa matina, in Colegio di 20 Savii, da poi auti tre Consigli, fo expedito la sententia fece li 3 provedadori sora i conti contra Piero di Stefani scrivani a li Governadori, ch'el pagasse per la mità dil neto etc. Eri, secondo Consejo, parlò domino Rigo Antonio dotor per lui; li rispose sier Zuan Antonio Venier provedador sora i conti, che fe' dita sententia con sier Hironimo da Canal et sier Marin Bon, et andò: 2 bone, una taià. Ma ozi parlò per lui domino Bortolamio Dolfin dotor; li rispose Venerio dotor, avochato fischal. Hor andò la parte e fo taiata: 11 de si et 9 di no; sichè fu streto giudicio.

187* Da poi disnar, fo Consejo di X con la zonta, ma prima nel Consejo di X semplice fu posto, per li Cai,

la gratia di sier Vetor Soranzo qu. sier Mafio, che fo mandato zoso da Consejo per andar procurando, ch'el possi ritornar a Consejo. Ave 16 de si, et una de no: non fu presa: vol tutte le balote.

Fu poi posto con la zonta altre parte per trovar danari, e trovano zercha ducati 3000: *videlicet* tra li altri, sier Francesco Venier di sier Zuane per la pruova di savio ai ordeni dete ducati 200, *ut in parte*, hor dà altri ducati 200 et incorpora tutti ducati 400, et è fato creditor in banco da averli passà anni, sicome fece sier Andrea Bolani il Consejo di X pasato.

Item, sier Marco Antonio Dandolo qu. sier Zuane, va patron al Zafò, presta a la Signoria ducati 100 per uno anno, et li vien dà la prova di anni 30 non obstante non l'habi, et va patron di dita galia.

Dil campo nostro, da Vicenza, a vespero fo letere dil provedador zeneral, di ozi, hore 12. Come i nimici sono pur a Sozan nè si moveno fin quella hora; et scrive el signor capitano zeneral vol star li a Vizenza et si tien esser segurissimo etc.

Di campo predito, vene letere a hore 23 in zercha, hessendo venuto zoso Consejo di X, et fo lecte con sier Alvixe Pixani consier e do Savii a terra ferma, *scrive il capitano zeneral, di ozi, hore 16.* Come, per uno stratioto di Piero Frassina venuto da lui, acerta il campo inimico averlo visto venir in questa matina a Barbaran, et acerta questo; *tamen*, ni da Troylo Pignatello, ni Mercurio Bua non ha nulla di questa levata, che si meraviglia; pur questo *etiam*, lui capitano non si vol mover di Vizenza, ma aricorda si fazi etc., *ut in litteris*.

In questo Consejo di X, fu preso di dar il Pregadi a la lite di sier Filippo Morexini qu. sier Andrea con sier Ruberto Morexini, per la intromission fece sier Antonio Boldù el cavalier, *olim* avogador, hessendo ubligado depositar in termene di zorni 4 li ducati 200 a imprestado per uno anno; e non li depositando, sia dato le do Quarantie, sicome vol sier Filippo Morexini predito.

Serenissime Princeps ac Domine, Domine 188 mi observandissime.

La Serenità Vostra à inteso quante vexation, depredation, incendii e ruine patiscono et hanno patido et miserabilmente tolerato li subditi de questa christianissima et sacrosanta Republica, non *solum* ne li beni et facultà sue, ma *etiam* ne le proprie persone sue e de le done et fameglie loro, per la presente guerra et barbarie incursion de nimici, et *præci-*